

Nunatta avataaniit Nunatsinnut angalanermi piumasaqaatit pillugit Namminersorlutik Oqartussat nalunaarutaat (Immikkoortoq 2)

Nappaatit tunillaassortut akiorniarlugit iliuutsit pillugit Inatsisartut peqqussutaanni nr. 20 12. november 2001-meersumi, Nappaatit tunillaassortut akiorniarlugit iliuutsit pillugit Inatsisartut inatsisaatigut nr. 1, 1. april 2020-meersutigut allanngortinneqartumi, §§ 6, 6 a, 12 a, 12 b, 12 c, 21 a aamma 21 b aamma § 29 imm. 2 malillugit aalajangersarneqarpoq:

Atuuffii

§ 1. Nalunaarut Kalaallit Nunaannukartunut atuutissaaq.

Atuuffiata killilerneqarnera

§ 2. Nalunaarummi matumani aalajangersakkat ilaat tamarmilluunniit inunnut inuiaqatigiinnut pingaarutilimmik sulialinnut atuutsinneqassanngitsut aalajangerneqarsinnaavoq.

Imm. 2. Inunnut Kalaallit Nunaanni Politiini sulisunut Kalaallit Nunaanni Politimesteri imm. 1 naapertorlugu aalajangiisassaaq.

Imm. 3. Inunnut Issittumi Sakkutooqarfimmi tassanilu immikkoortortaqaqfinni sulisunut Issittumi Sakkutooqarfimmi pisortaasoq imm. 1 naapertorlugu aalajangiisassaaq.

Imm. 4. Inunnut Peqqinnissaqarfimmi sulisunut Nunatsinni Nakorsaaneqarfik imm. 1 naapertorlugu aalajangiisassaaq.

Imm. 5. Inunnut imm. 2-4-mi taaneqanngitsuni sulisunut, Nunatsinni Nakorsaaneqarfik imm. 1 naapertorlugu aalajangiisassaaq. Tamatuma saniatigut Nunatta Nakorsaaneqarfianut qinnuteqarnikkut inunnut inuiaqatigiinnut pingaarutilimmik sulialinnut § 7-imit immikkut akuersissuteqarsinnaavoq.

Imm. 6. Nunatsinni Nakorsaaneqarfiata nalunaarummi matumani aalajangersakkat ilaat tamaasaluunniit peqqinnissaqarfimmi katsorsarneqartunut atuutinneqassanngitsut aalajangersinnaavaa.

Imm. 7. Nunatsinni Nakorsaaneqarfiup angalasut taakku Covid-19-imik tunillatsissimanerannik ilimanarsinnaappagit §§ -init3 aamma 7-imit immikkut akuersinnaavai. Angalasut aallarnissaq sivikinnerpaamik ullunik qulinik sioqqutsillugu uppernarsaatissanik nakorsaanermut nassiussissapput. Immikkut akuersissuteqarnissaq akuersissutigineqarpat qinnuteqartoq aallartinnani allakkatigut uppernarsaammik nakorsaanermit tunineqassaaq.

Imm. 8. Meeqqat aqqaneq-marluk ataallugit ukiullit §§-ini 3-mi 7-imilu ilaatinneqanngillat. Meeqqat

aqqaneq-marluk ataallugit ukiullit § 6, imm. 1-imi allattorneqarsimasut avataannut illoqarfinnut nunaqarfinnullu allanut angalasinnaapput angalaqataat taamaalorsinnaappata.

Angallammi Kalaallit Nunaannukartussami ilaasunut piumasaqaatit

§ 3. Angalasut Covid-19-istik nappaateqannginnerminnik uppersaammik takutitsisut kisimik timmisartumut Kalaallit Nunaannukartussamut ilaaqusaapput. Oqaaseqatigiinni siullermi taaneqartup naammassinninnissaa angallatip piginnittuata akisussaaffigaa.

Imm. 2. Covid-19-istut misiligit napparsimmavimmi peqqissaavimmiluunniit assigisaanilu Nunat Avannarliit ilaanni suliarineqarsimassaaq Kalaallillu Nunaannut aallarnermi ullut tallimat (akunnerit 120-t) sinnerlugit pisoqaanerussanngilaq.

Imm. 3. Covid-19-istut misissortinnissamut piumasarineqartut Nunatsinni Nakorsaaneqarfimmit aalajangersarneqartut naammassineqarsimassapput.

Imm. 4. Nunatsinni Nakorsaaneqarfik imm. 1-istik 2-millu immikkut akuersissuteqarsinnaavoq.

Imm. 5. Inuit Savallimmiunit imaluunniit Islandimit Kalaallit Nunaannut angalasut aamma Kalaallit Nunaannut aallarnissaa sioqqullugu ulluni 14-imi kingullerni Savallimmiuniissimasut, Islandimiissimasut imaluunniit Kalaallit Nunaanniissimasut imm. 1-imi ilaatinneqanngillat.

Umiarsuarni il.il. Kalaallit Nunaannukartussami ilaasinnaanermut piumasaqaatit

§ 4. Umiarsuit ilaasartaatit, matumanilu ilaallutik umiarsuit takornarianik angallassissutit Nunatsinnukartigatik ulluni kingullerni 14-imi nunat allat umiarsualiviini tulaqqasimappata Nunatsinni tulassinnaanngillat, matumani Savallimmiuniissimappata Islandimiissimappataluunniit allatulluunniit iliornikkut ilaasunik ikiffigineqarsimappata. Nunap immikkoortuanut tamarmut atuuppoq, matumanilu imartamut, taamaattoq nunat tamalaat akornanni pisussaaffiit ataqqillugit. Oqaaseqatigiinni siullermi aappaanilu taaneqartup naammassinninnissaa angallatip piginnittuata akisussaaffigaa.

Imm. 2. Umiarsuit ilaasartaatit, matumanilu takornarianik angallassissutit Nunatsinnukartigatik ulluni kingullerni 14-imi nunat allat umiarsualiviini tulassimanngitsut § 3-imi, § 6, imm. 2-imi aamma § 7-imi ilaatinneqanngillat, kisianni nunat tamalaat akornanni angalaartut pillugit aalajangersakkanut ilaatinneqarlutik.

Imm. 3. Imm. 1 aamma 2 angallatinut nuannaariartaatinut aamma atuupput. Nunatta Nakorsaaneqarfia tassannga immikkut akuersissuteqarsinnaavoq.

Imm. 4. Imm. 1 aamma 2 umiarsuarnut aalajangersimasumik aqquteqarlutik Nunatta umiarsualiviinut tulattartunut taakkunanngalu avalattartunut atuutinngilaq.

Timmisartut Nunatsinnukartut paasisutissiisussaataitanerat

§ 5. Angalasut Immersugassamik Sumut-mik immersuisimasut kisimik timmisartumut Nunatsinnukartussamut ilaaqusaapput. Angalasoq Immersugassamik Sumut-mik immersuisimanermut nassiussisimanermullu uppersaammik timmisartumi sulisumut timmisartumut ikinnginnermini takutitsissaaq. Oqaaseqatigiinni siullermi aappaanilu taaneqartup naammassinninnissaa angallatip piginnittuata akisussaaffigaa.

Illoqarfiit nunaqarfiillu Nunatsinnukartunut killilersuiffiunngitsut

§ 6. Illoqarfinni nunaqarfinnilu tulluittuni Nunatsinnukartunut killilersuiffiunngilaq:

- 1) Avannaata Kommuniani:
 - a) Ilulissat.
- 2) Kommune Qeqertalimmi:
 - a) Aasiaat.
 - b) Qasigiannguit.
 - c) Qeqertarsuaq.
- 3) Qeqqata Kommuniani:
 - a) Kangerlussuaq.
 - b) Maniitsoq.
 - c) Sisimiut.
- 4) Kommuneqarfik Sermersuumi:
 - a) Nuuk.
 - b) Paamiut.
- 5) Kommune Kujallermi:
 - a) Narsaq.
 - b) Narsarsuaq.
 - c) Qaqortoq.

Imm. 2. Taamaattoq nunatsinnukartut tikiffissami tungaanut qanermut assiaquteqassapput.

Oqaaseqatigiinni siullermi taaneqartup naammassinninnissaa angallatip piginnittuata akisussaaffigaa.

Tikiffissat ilaannut angalanermi mianerisassat

§ 7. Nunatsinnukartut § 6, imm. 1-imi illoqarfiit, nunaqarfiit najugaqarfiilluunniit allanneqarsimasut avataannut angalasut tassunnaqqusaanngillat Covid-19-imik tunillatsissimannginnermut uppersaqqartatik.

Imm. 2. Inuit imm. 1-imi pineqartut Nunatsinnut tikereernerup kingorna ullut tallimassaani kingusinnerusukkulluunniit Covid-19-imik napparsimanermut misissortinneqarsinnaapput.

Misissortinneranni tunillatsissimanngitsut paasineqarpat inuit Covid-19-imik tunillatsissimanngitsutut naatsorsuutigineqassapput angalaqqilersinnaallutillu.

Imm. 3. Misissuinerimi nappaammik nassaartoqarpat inuk pineqartoq tamanna pillugu malittarisassat nalinginnaasut malillugit katsorsarneqalissaaq, takuuk Nappaatit tunillaassortut akiorniartugit iluutsit pillugit Inatsisartut peqqussutaat.

Imm. 4. Inuk Covid-19-imut misilitsinngikkuni angalaqqissanngilaq pineqartoq ulluni 14-imi Nunatsinneereerluni Covid-19-imillu tunillatsissimanermik ersiuteqarani angalaqqilersinnaavoq.

Imm. 5. Inuit Savalimmiunit imaluunniit Islandimit Kalaallit Nunaannut angalasut aamma Kalaallit Nunaannut aallarnissaa sioqqullugu ulluni 14-imi kingullerni Savalimmiuniissimasut, Islandimiissimasut imaluunniit Kalaallit Nunaanniissimasut imm. 1-imi ilaatinneqanngillat.

Tunillatsinnissamut aarlerinartorsiorfimmii Nunatsinnukartunut malittarisassat

§ 8. Nunatsinnukartut ulluni 14-inik sioqqutsillutik Danskit Nunanut Allanut ministeriaqarfianit angalanermut ilitersuutaanni tunillatsinnissamut aarlerinartorsiorfiusutut nassuiarneqartuniissimasut katerittarfinni, aaqqissuussinerni, pisussani il.il. peqataassanngillat § 7, imm. 2 aamma 4 naapertorlugit Covid-19-imik tunillatsissimannginnermut uppersarsaaqqaaratik. Matumani illup iluani, silami, pisortat inuillu katerittarnerat, aaqqissuussinerit pisussallu il.il. pineqarput.

Imm. 2. Pisortat suliffeqarfiutaani assigisaanilu isersimanermut, inuussutissarsiortut inigisaanni tamanut ammasuni isersimanermut aamma pisortat namminersortullu utoqqarnik paaqqutariallit angerlarsimaffiat napparsimavinnulluunniit isersimanermut inerteqqussut aamma atuutinneqassaaq. Taamaattoq ulluinnarni nioqqutissanik pisiniarnerit allatullu pisariaqavissumik pisiniarnissat allanit isumagineqarsinnaanngitsut isumaginissaat akuerineqarput.

Imm. 3. Inerteqqut illoqarfinni nunaqarfinnilu § 6, imm. 1-imi taaneqartunut aamma atuuppoq. Angalasut taakku § 6, imm. 1-imi illoqarfiit nunaqarfillu taaneqartut avataannut angalaqqusaanngillat § 7, imm. 2 aamma 4 naapertorlugit Covid-19-imik tunillatsissimannginnermut uppersarsaaqqaaratik.

Imm. 4. Peqataasut taamaallaat inoqutigiiuppata imm. 1 inissiamut atuutissanngilaq.

Imm. 5. Immikkoortut 1 aamma 2 katersuunnernut politikikkut allatulluunniit isummersornissamik siunertalinnut atuutinngillat.

Pineqaatissiissuteqartarnej

§ 9. § 3, imm. 1, § 4, imm. 1-3, § 5, § 6, imm. 2, § 7, imm. 1, 2 aamma 4-mik aamma § 8, imm. 1-3-mik unioqqutitsisoq pinerluttulerinermik inatsit malillugu pineqaatissinneqarsinnaavoq.

Imm. 2. Ingerlatseqatigiiffiit il.il. (inatsisilerinermi inuttut immikkoortutut isigineqartut) pinerluttulerinermik inatsimmi kapitali 5-imi malittarisassat malillugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput.

Imm. 3. Akiliisitsissutit Nunap Karsianut tutsinneqassapput.

Atuutilerfia

§ 10. Nalunaarut 21. juli 2020-mi atuutilissaaq.

Imm. 2 Nalunaarut malillugu killilersuinerit, inerteqquteqartitsinerit, peqqusinerit il.il. 31. december 2020 tikillugu atuutissapput.

Ikaarsaariarnermi malittarisassat

§ 11. Inuit 21. juli 2020 sioqqullugu nunatsinnukartut Nunatta avataanniit timmisartukkut Kalaallit Nunaannut angalanermi piumasaqaatit pillugit Namminersorlutik Oqartussat nalunaarutaat nr. 25, 3. juli 2020-meersumi (Immikkoortoq 1) ilaatinneqarput. Inunnut taakkununga killilersuinerit, inerteqqutit, peqqussutit il.il. Namminersorlutik Oqartussat nalunaarutaat nr. 25, 3. juli 2020-meersooq naapertorlugu atuupput nalunaarummi uani § 7, imm. 2 aamma 4 naapertorlugit Covid-19-imik tunillatsissimannginnermut uppersarsaaqqaaratik.

Namminersorlutik Oqartussat, ulloq 20. juli 2020

Anna Wangenheim

/

Tine Pars

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut